

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 17 (1921)

Artikel: La renaschientscha dil romontsch

Autor: Demont, Giusep

DOI: <https://doi.org/10.5169/seals-881968>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>



La renaschientscha dil romontsch.

Da Giusep Demont.

La romontsch ei, sco la libertat, ina nobla feglia de nossas montognas. Bein mauncan a nus segiras novas sur de siu origin; ma da certs factums selai ei concluder, ch'il lungatg retic ei bia pli vegls ed originals ch' il latin, che quel stat cun l'auter presapauc el medem grad de parentella sco nevs ed aug. Pér suenter ch' ils Rets ein stai suttamess dals Romans, ei il lungatg latin vegnius enferlaus vid la plonta dil lungatg retic. Ils Rets hardenon tenor Mommsen acceptau pli tard che lur vischins lungatg e cultura dils Romans, gie il pli davos de tuts. Sco 'i auda eis ei probabel mai reussiu de far emprender latin nos babuns rets ed a-schia ei in considereivel tschep de lungatg retic semantenius. Quel vegneva in temps plidaus el territori dellas alps dal Gotthard entochen la Mar adriatica e dal Po entochen la Donau. La lingia denter Como e Verona po presapauc haver formau ils confins meridionals, las montognas bavaresas ils confins septentrionals dil territori retic. Encunter igl Orient s' extendeva quel entochen il Friaul, encunter ils Venets ed Jllirichers. Denter Rets, Venets ed Jllirichers duei esser stau ina certa paren-

tella. Ein ils Rets descendents dils Etruscs, ne in pievel celtic? Sin quella damonda ha la historia aunc anflau negina franca risposta: denton eis ei de supponer, ch' ei setracti cheu ded in pievel mischedau.

Jl lungatg retoromontsch havess cun tala gronda extensiun bein saviu daventar in impurtont lungatg de cultura, sche l' invasiun generala fuss buca vengida e havess privau el pigl emprem da tuts centrumis intellectuals ed allura catschau el da vart septentrionala e meridionala tont allas stretgas, ch' igl ei restau mo treis territoris retoromontschs spatitschai, numnadamein la Rezia, grischuna, il Tirol ladin ed il Friaul. Numerus numis locals el territori germanisau u italianisau dattan aunc oz perdetga dell' anteriura extensiun dil vegl lungatg retic. Jl meglier han ils Grischuns conservau il lungatg e spért retoromontsch. Per munconza d' ina litteratura scretta ei denton l' influenza jastra, cunzun de spért e plaid german, stada gronda e ha pereclitau ferm il lungatg romontsch. Era ha ei els temps d' evoluziun politica e sociala buca muncau nauschs prighels pil romontsch. Ma sco l' invasiun generala, che ha sfraccau il grond imperi roman, ha buca podiu derscher il ruver romontsch, aschia ha quel era podiu resister als prighels, ch'ein suondai el temps feudal. Jl cumin grischun e la visch-naunca ein sesvilupai e cun els dretgs e libertats. Suenter il glorius combat silla Tgalavaina, nua che nos babuns han sigilau lur libertat cugl agen saung, ha la litteratura romontscha entschiet a catschar

cagls e flurir. Jls beadis ded ozildi ein ils artavels ded in grond e custeivel scazi litterar romontsch, il qual ha acquistau a nies lungatg in plaz ella familia neolatina, fertond ch' ils Ladins tiroles ed ils Furlans cun ina populaziun ca. 10 ga pli numerosa ein buca vegni d' alzar lur lungatg ord il stadi de dialect.

Novs prighels ein denton naschi pil romontsch el 19. tschentaner, cunzun entras scola, caserna e commers, che han tratg nies pievel orda sia isoladadat e mess el en contact prialmein cugl element german. Milsanavon ei era il spért materialistic, che mesira las caussas mo tenor lur valzen economic ed utilitaristic, staus de perniziusas consequenzas pil svilup dil romontsch e sia litteratura. Ma il saun sentiment de nies pievel e sia fideivla amur per la faviala artada sco era il premurau idealismus de buns patriots han puspei spindrau il romontsch dalla perdiziun. Igl ei empaу alla gada era vegniu fundau societats cul scopo de mantener e cultivar la venerabla viarva della veglia Retia.

De quei moviment nazional ein la *Societat Retoromontscha*, (fundada 1886), la *Romania*, (f. 1895), l' *Uniun dils Grischs* (f. 1904), l' *Uniun romontscha de Schoms* (f. 1913) e l' *Uniun romontscha de Cuera* (f. 1915), sco era las differentas societats romontschas ordeifer il cantun Grischun separticipadas. Ma entochen ussa luvravan ellas mintgina dapersei ed existeva propri (abstrahau dalla Romania e l' *Uniun romontscha de Cuera*) negin ligiom e ne-

gina cuminonza, che havess uniu lur forzas per in communabel operar. Cheu ei il clom dils *Ladins tiroles* per liber dretg de disposiziun, era en interess de lur caracter nazional, igl atun 1918 penetraus ellas montognas grischunas ed ha anflau leu in viv echo, pertgei ch' ins ei cheu seregurdaus dils ferms ligioms de communabel origin, lungatg e cultura, ch' uneschan dapi tschentaners e tschentaners il pievel romontsch grischun culs Ladins tiroles. (1) Representants de tuttas societats romontschas han il Fevrer 1919 en ina memorabla conferenza a Cuera, convocada dall' Uniun rom. de Cuera, concludiu ina acziun de simpatia e solidaritat per ils tribulai confrars ladins. Quella manifestaziun ha buca mo el Grischun e tier nos confederali svizzers, gie perfin egl jester fatg la megliera impressiun, anzi ei era daventada alla finala per ils romontschs sez de grondissima impurtonza. Per l' *emprema* gada havvan cheu ils romontschs della Surselva, dil Plaun, della vall de Schoms, della Sursaissa romontscha, Engiadin' aulta e bassa sco era della capitala grischuna porschiu in a l' auter il maun ed eran s'uni sco fegls della *medema* mumma. Els fuvan denton era vegni ferm pertscharts, ch' ei seigi ner temps de defender las posiziuns dil romontsch el Grischun. Per quei intent ein las prestonzas de tuttas uniuns romontschas seredunadas 1919 ina domengia de stad a Tusaun per secussegliar sur las mesiras necessarias per puder prevegnir cun success als pri-

(1) vide sut Litteratura pag. 20.

ghels smanatschonts a nossa mumma romontscha. «*Romontschs voleinsa restar!*» Quei ei stau la ferma e decidida resoluziun d'in e scadin dils participonts. (2) La fin d' October 1919 han ils representants plenipotenziai de tuttas uniuns romontschas dil cantun fatg cumin a Cuera e concludiu unanimamein la fundaziun ded ina *Ligia*, numnada «*Ligia Romontscha*» (L. R.) (3)

Jl principal scopo della nova ligia, numnademain d' unir las societats romontschas existentes e che neschan egl avegnir, ei pia gia cun sia fundaziun staüs, per il moment ded ussa, realisaus. Tuttas capo-uniuns romontschas de nies cantun ein daventadas commembras della Ligia, mantenend denton l' autonomia enten lur atgnas fatschentas. La ligia s' occúpescha insumma de damondas ed aspiraziuns, las qualas presupponan il luvrar *communabel* de tuts romontschs. Ella vul era sustener e promover ils interess communabels dellas differenças societats, mantener e carschentar il romontsch, siu spért e svilup, sia influenza en familia, scola, baselgia ed en la veta publica (art. 1 dils tschentaments). Mintga societat ha ella redunonza de delegai *treis* vuschs *fundamentalas* e per mintga 200 commembers ne fracziuns de quei diember *ina* vusch, ma silpli *diesch* vuschs. Jls delegai dellas societats q. e. lur redunonza, formeschon igl organ suprem della L. R. El comite ein dapresentamein tuttas 5 societats commembras representadas.

El secompona suondontamein: G. Conrad, se-

cretari de posta, Cuera, president. Dr. Gian Rud. Mohr, redactur, Cuera, vicepresident. Gius. Demont, redactur, actuar, Sur canoni Chr. Caminada, Cuera, e Prof. Dr. C. Pult, redactur digl idioticon, S. Gagl, assessurs. Jls emprems treis formeschan il directori.

Quella fundaziun e l' energica acziun della L. R. han anflau l' attenziun ed igl interess dil pievel grischun, setractescha ei gie quella gada della sort de nies agien lungatg e de nossa cultura. «*Oz Romontschs ne mai pli!*»

Per realisar il grond e grev pensum ein las forzas finanziaras disponiblas denton semussadas nonsufficientas. Ma en consideraziun della eminenta impurtonza nazionala e culturala dil manteniment dil lungatg romontsch ha il cussegl grond dil cantun Grischun sin instanza della L. R. decretau en sia sessiun dil Schaner 1920 per quella *in subsidi annual de 10,000 fr.* (4)

Nos conburgheis italians e tudestgs san bein appreziar la muntada culturala e nazionala dil lungatg romontsch pil Grischun, mantegn gie quel cul romontsch siu agien caracter original e resta in cantun cun treis lungatgs, che vivan in sper l' auter en tutta concordia, gie influenziond in l' auter sin favoreivla moda, caussa tant admirada dals pievels confinonts.

Da cheu seresulta era per scadin Grischun la obligaziun, de porscher maun per conservar dalla perdizion quei impurtont factor de nossa veta culturala e nazionala. De questa perschuaision ei era

il commemorabel e decisiv conclus dils represen-tants dil pievel grischun dils 30 de Schaner 1920 naschius e ha quei generus act de solidaritat, che vegn a terlischar sco in dils principals factums en nies moviment, aquistau il profund engraziament dils romontschs.

Ji stupent bienmaun dil cantun ha dau niev anim als romontschs de dedicar lur forzas al man-teniment e svilup dil carezau lungatg mumma. La summa decretada ei denton semussada nunsuffi-cienta ellas relaziuns de carischia d' ozildi, per pro-veder il pievel romontsch cun la necessaria littera-tura, cun diczionaris e grammaticas e la scola cun ils adattai miets d' instrucziun. Ei setracta era buca simplamein dils considereivels quots de stampa e dil material, anzi era della producziun litterara sezza, la quala munglass vegnir promovida cun honorars e premis.

Per pia saver ademplir tont sco pusseivel siu vast pensum, ei la Ligia aunc s'adressada tier las vischnauncas romontschas per susteniment finan-ziar, supplicond ellas per contribuziuns annualas a norma de 5 francs per mintga 100 olmas della po-pulaziun romontscha. Tochen quest atun havevan gia passa 70 vischnauncas correspondiu a quella supplica. Quella prompta bunaveglia de nies pie-vel, ded era portar unfrendas pecuniaras pil man-teniment dil lungatg romontsch, pia per in scopo ideal, ei ina caussa zun legreivla e survarga en in cert grau l' impurtonza dellas contribuziuns sezzas.

Ual quellas pintgas contribuziuns de nossas visch-nauncas montognardas, che battan per part in dir combat d' existenza, ei in eclatant mussament, che il pievel romontsch sanczionescha nossa acziun nazionala.

Per obtener las intradas necessarias, per realisar siu programm, ha la Ligia denton aunc stoviu sevolver tier la mumma Helvetia. Sgr. prof. Dr. Tuor a Friburg ei vegnius incaricaus cun la redacziun d' ina petizion agl ault cussegl federal per mauns dell' assemblea federala per ina subvenziun annuala de medemamein 10,000 fr. L' excellenta moda, cun la quala quei petitum ei vegnius giustificaus, las grondas simpatias, che regian ell' entira Svizzera per nossa acziun, la propaganda generala, ch' ils amitgs dil romontsch han destadau dapertut, e plinavon las oreifras peroraziuns de nos representants ellas combras federalas, han mienau quella petizion tier in ventireivel resultat. Aschia ei la basis finanziala per la Ligia Romontscha garantida. (5)

* * *

Sils 26 de Settember 1920 ha la L. R. convoau sia emprema redunonza de delegai a Cuera. Quest' assamblea nazionala romontscha haveva de decider sur ded impurtontas questiuns, aschia sur della creaziun d' in secretariat e sur puncs de finanzas. Il budget per 1921 preveda subvenziuns per las differentas societats sco era per diversas ediziuns. Ultra de quei retractava ei de stabilir certas directivas per la Ligia en siu futur operar.

L' Uniun romontscha de Cuera ha perquei anflau per indicau de s'orientar e secussegliar en quelas damondas. Quell' impurtonta orientaziun ha sgr. prof. Dr. P. Tuor porschiu ils 25 de Sett. en ina redunonza dell' Uniun romontscha a Cuera cun in referat de valur programmatica. (9) Exponend il svilup historic dellas differentas societats, ha el mussau la basis e la maniera d'operar de mintgina de quellas sco era las directivas, che seresultan per la Ligia ord tal svilup historic e las presentas relaziuns. Ferton che la Societat retoromontscha reuniescha ils intellectuals romontschs digl entir cantun ed ha en sias Annalas in organ per publicaziuns plitost scientificas, ein, *Ia Romania e l' Uniun dils Grischs*, quellas principalas societats regionals, organisaziuns dal tuttafatg popularas, sebasond ellas sin las ideas e las tradiziuns dil pievel, las quals han sin quella basis fructificau rehamein la veta e litterattura romontscha. *L' Uniun romontscha de Cuera* ha scaffiu in centrum romontsch per la capitala grischuna e ha entras referats, sia sera romontscha e sia schinumnada scola romontscha buca mo dau niev impuls als romontschs della capitala, anzi era scaffiu bunas relaziuns cun ils romontschs della tiara, cunzun cun ils deputai romontschs. Egl avegnir vegn l' Uniun romontscha buca meins a haver d'ademplir in' impurtonta missiun e quei era el contact dils romontschs cun ils Grischuns tudestgs e taliens. Possi ella en sia carica anflar il susteniment de tuts romontschs della capitala!

Denton ei il basegns ded in ligiom communabel denter las differentas societats plaun e plaun semussaus ed ei era semanifestaus el factum, che in bi diember romontschs ein commembers de pliras ne perfin tuttas societats romontschas. Quei ligiom ei ussa formaus dalla L. R., organisaziun generala, centrala, ch' unescha las singulas societats, laschond a quellas lur independenza.

Ma buca mo ligiom vul la L. R. esser, anzi era in *sustegn finanzial e moral* per las societats. In de ses principals scopos ei allura de promover *l'idea dell' unitat nazionala e linguistica* sco era della *solidaritat* dil pievel romontsch. Ils romontschs duein esser pertscharts, ch' els formeschon mo *in pievel*, ch' ei dat buca mo romontschs ell' Engiadina e Surselva, anzi era en Sursaissa romontscha, Dumliasca ed el Plaun. Consequentamein stuein nus era luvrar *per tuts* ed unir *tuts* romontschs per nossa lavur nazionala.

Per prommover quei intent fuss ei de giavischar ina *fiesta generala* per ils romontschs; ina tala fuss en medem temps adattada per destadar igl entusiasmus nazional.

Sco organ central dellas differentas societats romontschas ed en medem temps digl entir pievel romontsch per igl agir ed operar communabel, obtegn la L. R. buca mo *directamein*, anzi era *indirectamein* e *moralmein* influenza ed impurtonza. Ella vegn en quella qualitat a render il romontsch pli e pli ren-

conoschius e consequentamein era svegliar pli e pli il spért nazional ella veta publica e quotidiana.

La cultivaziun purmein scientifica e litterara de nies lungatg spindrass buc el dalla mort. Oravontut sto perquei *igl idioticon* vegnir menaus ad ina buna fin. Urgentamein de basegns ein *diczionaris* e *grammaticas*. La L. R. duei gidar nus tier quellas ovras. Ella duei era sustener finanzialmein las differentas *societats* enten lur operar, pertgei quellas prestan lavur fundamentala cun cultivar il romontsch e sia litteratura en connex cun il pievel e sin la basis de sia tradizion e perschuasiun ed ein insumma per l' acziun e la veta romontscha caussa principala. Las relaziuns d' ozildi ein buca adattadas pli per ina sufficienta producziun litterara senza equivalent material. Igl èr litterar romontsch sto perquei vegnir fructificaus entras raschuneivels hono- rars e premis.

Tuts quels scopos ein denton mo realisabels cun igl agid finanziar della L. R. Quel basta denton buca per era mantener las bunas relaziuns dentier la L. R. e las singulas *societats* sco era la pasch e concordia el pievel romontsch enten prosequir ils differents scopos, anzi, ei vul era stabillir certs tiarms. La L. R. vegn perquei a s'abstener da tutta concurrenza cun las *societats* e perquei oravontut tralaschar l' ediziun d' in agien organ litterar, ed ev. serestrenscher sin in fegl de correspondenza, considerond ediziuns litteraras periodicas per domena dellas *societats*. Medemamein vegn ella buca a

subvenzionar directamein ne edir sezza publicaziuns cun caracter *preponderontamein confessional u politic.* Animositats ne malperinadats naschentas da talas raschuns fussen en tuts graus perniciusas per la L. R.

Quellas directivas de Sgr. prof. Dr. Tuor ein sin proposiziun dil comite era vegnidas adoptadas dalla redunonza de delegai della Ligia. Quest em-prem parlament romontsch dils 26 de Settember a Cuera ha sut il presidi de Sgr. *Giacun Conrad*, igl activ president della Ligia, insumma prestau en unitat e harmonia ina considereivla ed impurtonta lavur. (7) Essend las fatschentas della Ligia s' augmentadas tal'uisa, ch' ellas pretendevan ina forza, che savess sededicar regularmein a quellas sco ei sedamonda, era la questiun d' in agien *secretariat* daventada actuala ed urgenta. Ins senuspeva bein dils quosts d' ina tala instituziun, ma in' autra sligiazion convenienta e cumentonta pareva difficila. Alla buna veglia e sacrificiata dat dil redactur digl idioticon, Sgr. prof. *Dr. Pult* a S. Gagl, ed entras ina ventireivla entelgentscha cun Sgr. prof. *Dr. Tuor*, sco representant della Romania ei ina combinaziun cul secretariat digl idioticon reussida, la quala ei generalmein vegnida beneventada. Il secretariat digl idioticon vegn translocaus da S. Gagl a Cuera e dedichescha il secretari, actualmein Sgr. scolast *Loringett*, provisoricamein la tiarza part dil temps de lavur allas fatschentas della Ligia encunter directa salarisaziun da questa.

Ina questiun d' eminenta impurtonza era allura igl impiendi dellas *finanzas* della Ligia per sustener e promover la lavur pil romontsch. En emprema lingia retractav' ei cheu dil susteniment dellas societats ed allura principalmein de publicaziuns. Cheu han las directivas de Sgr. prof. Dr. Tuor prestau buns survetschs. Concernend las societats ei la sligiaziun prest stada anflada. La Societat reto-romontscha, la pli veglia e bein meritada, ei vengnida favorida el budget de 1921 cun in subsidi de 2800 fr., ch' ella impunda pigl idioticon. La Romania e l' Uniun dils Grischs ein omisduas vegnidas risguardadas cun 1500 fr. ferton che l' Uniun romontscha de Schoms, l' Uniun romontscha de Cuera e la Renania romontscha (fundada la stad vargada a Glion per la part reformada della Surselva e recepida dalla redunonza de delegai dils 26 de Settember 1920) figureschan el budget per 1921 cun in subsidi de mintgina 250 fr. Las societats han sin fundament de lur autonomia liber maun enten impunder lur subsidis, ma ein constrenschidas de render quen alla Ligia sur l' applicaziun de quels.

La finanziaziun e subvenziun de products de stampa han de daventar sin basis ed a norma de *neutralitat confessionala e politica*. Ei ha buca muncau vuschs, che pretendevan il susteniment finanziar de tutta producziun litterara, senza risguard sin lur caracter confessional ne politic. La Ligia ha, stabillend la neutralitat confessionala e politica,

evitau in prigulus .crap de scarpetsch, e quei ei per ella d' impurtonza cardinala, essend nuot pli necessari per ella, che ual l' unitat e la concordia.

La dieta romontscha dils 26 de Sett. ha aschia prestau il mussament, che la barca romontscha vegn dirigida cun franc e segir maun. La buna harmonia ed entelgentscha ella Ligia ein ina prova della sincera premura per la gronda ed ideal a caussa de nies romontsch e paran en medem temps ded esser las meglieras garanzias per la prosperitat della Ligia. Il romontsch ei daventaus in ideal, che surmonta las differenzas politicas e confessionalas ed unescha il pievel e ses menaders tier communabel e harmonic operar. «Romontschs essan nus e Romontschs voleinsa restar!» ei la devisa dils Romontschs digl Inn e dil Rein, sper l' Alvra e Gielgia e sper la Plessur, della Dumliasca e dil Plaun. Quei demuossan eclatantamein era las bialas contribuziuns de tontas vischnauncas romontschas, entras las qualas il pievel ha documentau, ch' el prendi seriusamein l' acziun romontscha e vegli propri detschartamein la conservaziun de viarva e cultura retica.

Nos sforzs fussen denton vans, sche nus mantenin buc il romontsch oravontut en casa e familia dil pur. Nus stuein perquei porscher ad ella *lectura ed instrucziun romontscha*. Quei ei ina caussa fundamentala en nies moviment, pertgei la casa purila ei e resta comprovadamein la principala petga

de nies romontsch. Entras instrucziun duei il pievel insumma vegnir fatgs enconoschents endretg cun siu lungatg e sia litteratura, sco cun tuts auters scazis della cultura nazionala.

Quella meriteivla, tont necessaria ma era consideraiva lavur, grondamein neghligida entochen dacheu, pretenda denton in' intensiva lavur organizzatorica. Senza quella vegn ne la Ligia ne vegnan las caposocietats a puder entuorn d' ademplir il menzionau pensum. Ei vegn de mobilisar ed organisar nossas singulas contradas e vischnauncas per l' aczun romontscha. Per la Romania vegn ei a setractar de fundar secziuns ella Cadi, Foppa, Lumnezia, el Plaun, en Dumliasca ed en Sursaissa romontscha. Quell' uisa vegn buca mo ina divisiun della lavur a vegnir contonschida, ma era reussiu pli tgunsch de far separticipar il pievel en sia totalitat dil moviment romontsch, pia, studiai e nunstudiai, giuvens e vegls, umens e dunnauns. Cunzun las Romontschas astgan dacheudenvi buca restar passivas, anzi duein tenor il ludeivel exemplodelas dunnauns e feglias engiadinesas era semetter sut la bandiera romontscha. Per l' Uniun romontscha de Cuera sco centrum intellectual, considerain nus en special la scola romontscha, seigi en fuorma de cuors de lungatg ne academias, sco era frequents referats per la lavur indicada.

Oz Romontschs ne mai pli! Quei ei la parola, ch' ei daventada sco il griu d' uiara pils Romontschs el moment della decisiun. Sco Benedetg Fontana

ha ella battaglia della Tgalavaina, che ha cun la victoria de nos babuns spindrau nossas ligias e libertats, adhortau ell' ura decisiva ses combattants exclamond: «Oz las ligias, ne mai pli!» aschia possi el er' oz inflamar ses beidis per la campagna spirtala per il lungatg de nos vegls! Pilver, co savessen nus sefar pli vengonz de quels, che entras tal' ovra! Possi pia il spért de nos valerus babuns animar tuts fronschs Romontschs per la devisa: «Romontschs vulein restar!» Allura vegn ei segir aunc a vegnir Matg ina gada per nies romontsch!



Litteratura.

- 1) Vide Gasetta Romontscha Nr. 6, 8, 13 e 15 de 1919. — Bündner Tagblatt Nr. 26 de 1919. — Sin l' acziun pils Ladins serefereschan plinavon las Nr. 33, 35, 38, 39—42, 45, 47, 48, 53, 56, 60, 64, 70, 72, 77, 85, 94, 104 dil Bündner Tagblatt de 1919. — Nossas relaziuns culs Ladins tractescha la broschura: Die Ladiner und wir Bündner Romanen, Cuera 1919.
- 2) Gasetta Romontscha Nr. 31 de 1919. — Bündner Tagblatt Nr. 174 de 1919.
- 3) Gasetta Romontscha Nr. 43, 44 de 1919. Bündner Tagblatt Nr. 252, 1919.
- 4) Gasetta Romontscha Nr. 5 de 1920. — Bündner Tagblatt Nr. 26 e 29 de 1920.
- 5) Gasetta Rom. Nr. 48 e 49 de 1920. — Bündner Tagblatt Nr. 290—292 de 1920.
- 6) Gasetta Rom. Nr. 39 de 1920. — Bündner Tagblatt Nr. 224 de 1920.
- 7) Gasetta Rom. Nr. 39 de 1920. — Bündner Tagblatt Nr. 226 de 1920.

